

Biblioteca mester responde na un mundo digitalisa

ORANJESTAD—No tin duda cu e edificio principal di Biblioteca Nacional ta sera pa motibo di renobacion, a afecta hopi alumno y publico en general.

Dificilmente por spera cu e edificio secundario den Bachstraat na Playa cu su 500 meter cuadra lo por absorba locual e edificio principal di dos mil meter cuadra ta brinda. Pero asina mes a purba di

tur manera pa mantene e servicio mas optimo posibel bou e circumstancianan, segun Director di Biblioteca Nacional Astrid Britten.

“Nos ta ehecutando nos plan di maneho. E proyecto di renobacion ta obstaculisa e

trabou un poco, pero nos ta sigui cu nos actividadnan, manera e Festival di Buki unda ta sigui pone accento riba lesamento y promocion di esey.” Segun Britten, mester a adapta e trabou si, mirando cu e situacion ta diferente.

Un elemento cu si a keda cu su mesun enfasis ta e accesibilidad na bukinan di

literatura cu ta necesario pa alumnonan preparando pa examen. Tur e bukinan aki a muda pa e edificio na Bachstraat, cu inicialmente ta e seccion di Arubiana/Caribiana. Mas ainda, Biblioteca Nacional a pone personal disponibel na e dos scolnan di Colegio Arubano, tanto na Playa como San Nicolas pa asina duna mas asistencia na alumnonan. Tanto ex Emma school como e scol grandi di Colegio



Arubano tin un biblioteca awor cu ta traha tambe cu personal di Biblioteca Nacional. E empleadonan aki lo keda traha cu e scol te ora cu e proyecto di renobacion di e edificio principal di Biblioteca Nacional ta cla.

UN BIBLIOTECA MODERNO

Mientrastanto, Astrid Britten ta segura cu e plan di maneho pa Biblioteca Nacional, hunto cu e renobacionnan di e infraestructura lo permiti publico, incluso alumnonan na mas oferta pa loke ta informacion y literatura. Esaki ta inclui un oferta digital. Via Biblioteca

Tur e bukinan aki a muda pa e edificio na Bachstraat, cu inicialmente ta e seccion di Arubiana/Caribiana.

Nacional, publico lo por haya acceso na diferente biblioteca electronico, manera ‘Europeana,’ ‘Digital Library of the Caribbean,’ y tambe ‘World Digital Library.’ Te ainda Biblioteca Nacional ta ofrece unicamente e Digital Library of the Caribbean, pero e director ta spera di por agrega e otro dosnan riba e programa. Esaki por pasa unabez cu tin e edificio principal ta cla, cu tur su infraestructura necesario. Mester bisa cu den e ‘Digital Library of the Caribbean,’ publico por haya acceso na tur e edicionnan di Esso News. E acceso por tuma luga pa medio di www.dloc.com.

Minister encarga Arthur Dowers ta aplaudi e direccion pa drenta e era digital. “P’esey mes ta importante pa drecha henter e infraestructura di coriente. Banda di esey, mester drech a servicio na scolnan tambe. Nos ta analisando pa mira con ta trece bukinan mas serca di e scolnan, di e muchanan y e papel di Biblioteca Nacional mester ta uno mas grandi.” Minister Dowers ta bisa cu e ta sinti cu tin boluntad na Biblioteca Nacional pa traha riba e maneho aki, pero ta admitti cu Gobierno tin un papel pa hunga dor di pone mas medio financiero disponibel. Un otro opcion ta pa

crea un structura cu ta permiti Biblioteca Nacional ricibi donacion for di instancianan comercial, manera ta e caso cu hopi biblioteca rond mundo. Te ainda, Biblioteca Nacional di Aruba no por ricibi donacion pa motibo cu e ta un departamento di Gobierno. “Mi mira con entradanan a aumenta di bibliotecanan, unabez cu nan a bira un fundacion. Pues nos mester evalua pa den cualkier forma crea algo adicional, sea pa medio di un fundacion, pa sostene e trabou di biblioteca,” ta e comentario di Minister Arthur Dowers.